

'Pilihan raya tak semestinya awal'

BH - 30/9/2006

Oleh Ahmad Ghazali Musa

PEKAN: Datuk Seri Najib Razak berkata keputusan Majlis Tertinggi (MT) menangguhkan pemilihan Umno pada tahun depan bukan bermakna pilihan raya akan diadakan pada tahun itu.

Timbalan Perdana Menteri berkata, keputusan itu dibuat untuk memastikan setiap ahli Umno tidak memberi perhatian dan tumpuan kepada soal pemilihan sehingga mewujudkan suasana tidak tenteram dan stabil dalam parti.

Beliau berkata, jika pemilihan parti diadakan tahun depan, mungkin mulai tahun ini mereka sudah mula membuat persiapan dan perancangan pada peringkat bahagian untuk menentukan kejayaan mereka.

"Tak semestinya (keputusan MT untuk menangguhkan pemilihan Umno tahun depan), pilihan raya akan diadakan tahun depan. Pilihan raya boleh diadakan tahun depan, 2008 atau pun 2009.

"Keputusan MT itu untuk pastikan setiap anggota kita, tak akan memberi perhatian dan tumpuan kepada soal pemilihan, sebab kalau kita ikut jadual, tahun depan ada pemilihan.

"Ia boleh menyebabkan Umno tidak tenteram atau tidak stabil pada

peringkat bahagian untuk persiapan menghadapi pilihan raya umum.

"Jadi keputusan ini (tanggung pemilihan) tidak boleh dikaitkan (pilihan raya umum) dengan mana-mana tahun," katanya.

Beliau berkata demikian kepada pemberita selepas menghadiri Majlis Rahmat Ramadan Peneroka Felda Parlimen Pekan dan Penyampaian Surat Hak Milik Peneroka Felda Chini 4, di sini, semalam.

Najib yang juga Timbalan Presiden Umno berkata demikian ketika diminta mengulas ramalan pilihan raya umum ke-12 diadakan tahun depan berikutan keputusan MT melanjutkan tempoh pemilihan pucuk pimpinan parti itu kepada 18 bulan bermula September 2007.

Pemilihan pucuk pimpinan Umno diadakan tiga tahun sekali. Kali terakhir pemilihan parti diadakan 23 September 2004. Undang-undang negara menetapkan pilihan raya umum diadakan dalam tempoh lima tahun, kecuali jika Parlimen dibubar lebih awal.

Pilihan raya lalu diadakan pada 21 Mac 2004 dan ini bermakna mandat kerajaan hanya akan berakhir pada Mac 2009.

Najib berkata, tumpuan parti bukan soal pilihan raya, tetapi kepada kerja memperkuatkan parti.



PERDANA
LEADERSHIP
FOUNDATION
YAYASAN
KEPIMPINAN
PERDANA